

Dithero tsa Tirelano mo Kutlwanong

32/2014 Ka Sontaga o o bidiwang Eksaudi, e le ka 01. 06. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 34 - 32/31

2. Thapelo: Modimo, Rara wa rona yo o mo legodimong, romela Mowa o o Boitshepo mo go rona ba re bitsang mo go wena ka go kopa gore o re bitse, o re goge, o re sedifatse, o re rute, o re gomotse mo ditlalelong tsa lefatshe leno. Mowa o o Boitshepo, itshekise dithapelo tsa rona gore di ratege fa pele ga Modimo. Re rapela jalo mo leineng la ga Jesu Keresete, Morena le Mopholosi wa rona. Amen.

3. Epistolo ka fa thulaganyong ya 2 e kwadilwe mo go Baefeso 3:14-21;

Efangele ka fa thulaganyong ya 1 e kwadilwe mo go Johane 15:25 - 16:4.

4. A go ipolelwe tumelo ya bokeresete!

5. Sefela sa 156 - 139/140

6. Thapelo ya mmadi wa thero.

7. Epistolo ka fa thulaganyong ya 6 e kwadilwe mo go Baroma 8:26-30, e re:

"Mme Mowa le ona o thusa bokoa jwa rona jalo; gonne ga re itse se re ka se kopang ka tshwanelo; Mowa ka osi o re emela ka diphegelo tse di sa kgonweng go bolelwa. Mme Motlhotlhomisi wa dipelo o itse maikaelelo a Mowa; gonne ona o emela baitshepi ka fa go rateng ga Modimo. Mme re itse gore bone ba ba ratang Modimo, dilo tsotlhe di dira mmogo go ba tsalela molemo, e bong bone ba ba biditsweng ka fa boikaelelong jwa Modimo. Gonne ba o ba itsileng pele o ba tlaotse e le gore ba tshwane le popego ya Morwa-ona, a tle a nne motsalwa-pele mo baneng ba le bantsi. Mme ba o ba tlaotseng pele, e bile o ba biditse; ba o ba biditseng, e bile o ba siamisitse; ba o ba siamisitseng, e bile o ba galaeditse." Amen.

8. Thero: Barategi mo Moreneng wa rona Jesu Keresete, Lefoko la Modimo le na le kgomotso mo go rona ba re leng bana ba Modimo ba bannye, lefoko la Modimo le tletse kgomotso e kgolo mo go rona ba re leng bana ba Modimo ba ba bokoa thata. Lefoko la Modimo le na le kgomotso e kgolo mo go rona ba re leng bana ba Modimoka ka kolobediwa mo leineng la Modimo o o Borarobongwe ka go dumela mo go ona. Fa re lelela mo go ona, o a re utlwa. Fa re le mo tlalelong, o teng gaufi le rona. Fa re leofa, o rata go re itshwarela. Fa re le bokoa, Rara wa rona yo o mo legodimong o na le thata e kgolo, o a re thusa. Fa re paletswe, o re gorosa mo bokhutlong. Ka re sa kgone go ipholosa, o rata go re pholosa ka Jesu Keresete, Morwaaona. Fa re sa kgone go rapela, o re thusa ka Mowa o o Boitshepo gore o re rapelele, o re buelele, o re utlwele bothoko.

Ke nnete! Rara wa rona yo o mo legodimong ga o rate gore re leke go ikagela mo thateng ya rona, ga o rate gore re ikgalaletse, re iteboge, re itumise. Ga o rate gore re leke go kgona sengwe ka borona, mme o a rata gore re mo ikanye, re age mo go ona, mo motheong o e leng Jesu Keresete Mopholosi wa rona, mo godimo ga thata ya gagwe, mo godimo ga pholoso e re e baakanyeditsweng ke ene, re se ka re iikanya, mme re mo ikanye ene fela, bogolo go dilo tsotlhe. Ga a rate gore re thaye ntlo ya tumelo ya rona mo mošaweng, mme o a rata, gore re e thaye mo lefiking le le tlhomameng, e bong mo go Jesu Keresete. Re ipolela ka mafoko a Kategidima e nnye, re re: "Ke dumela gore ke palelwa ke go dumela mo go Jesu Keresete, Morena wa me, ka tlhaloganyo ya me, le fa e le ka thata ya me, le e seng go ikisa mo go ene ka tsona. Mme Mowa o o Boitshepo o mpiditse ka Efangele ... o intshepitsitse mo tumelong e e siameng ..." Phuthego e e rategang mo Moreneng wa rona Jesu Keresete, ke kang e kgolo thata. Modimo o roma Mowa wa ona o o Boitshepo mo go rona ba re leng bana ba ona gore o re thuse mo bokoeng jwa rona, gore re kgone go dumela mo go Jesu Keresete, re nne re ikanye Mopholosi wa rona, re nne le tlhaloganyo ya go goroga mo go Jesu Keresete, Mopholosi wa baleofi. Modimo ga o rate gore re ithaye kago ya rona mo nonofong ya rona, mme re age mo go Jesu Keresete. Go aga mo go Jesu Keresete ga go re dire gore re nne kwa tlase, mme re nne mo godimo ga yo mogolo, rona ba re itsiweng ke Modimo ka fa re ntseng ka teng, fa re tlhoka thuso ya nnete.

Mo Lefokong la thero ya kajeno re a utlwa gore Mowa o o Boitshepo ke Motšhomolodi wa mafoko a rona, e bong a diphegelo tsa rona gore di ratege mo

Modimong. O tsaya mafoko a a sa utlwaleng sentle a bana ba Modimo le a tlhaloganyo e e senyegileng ya bana ba Modimo, le go bua ga bana ba Modimo, o a go fetola gore a utlwale sentle fa pele ga Rara wa rona yo o mo legodimong, o a fetola go nna mafoko a mantle. O fetola le tlhaloganyo ya rona gore e nne e e siameng. Puo ya rona e nne e e siameng. Ke Motsereganyi wa rona fa pele ga Modimo. O tsaya dikopo tsa rona, le dilelo tsa rona, le difela tsa rona gore o di re tšhomolela go nna tse di natefelang Modimo, thapelo ya rona e o kgatlhe, le difela tsa rona di o kgatlhe. Ke ona o o re utlwang, le go re kgothatsa, o a dira gore mafoko a thapelo ya rona e nne mafoko a a siameng fela. Le fa re paletswe ke go rapela sentle, Mowa o o Boitshepo o tsaya dilelo, le diphegelo tsa rona go di dira gore di nne thapelo e e siameng fa pele ga Modimo. Mowa o o Boitshepo o tsaya go kwakwaetsa ga rona fa re go tlhatlosetsa mo legodimong, o a go fetola mo tseleng gore go goroge fa pele ga Modimo jaaka puo e e utlwalang sentle, e e itshekileng, e e rategang mo go Rara wa rona yo o mo legodimong. Ke nnete Mowa o o Boitshepo o dira tiro e e molemo bogolo ka dithapelo tsa rona, gore thapelo e e sa saimang e se ka ya goroga mo Modimong o o Boitshepo, go goroge teng koo thapelo e e siameng, e e boitshepo, e e rategang mo go ona.

O re buela ka mafoko a a boitshepo, a mantle, a a monate. A re se ka ra belaela ka tseo gore re dumele, fa re na le Moemedi yo montle, e bong Mowa o o Boitshepo o o re buelang, go fegela, le go kwakwaetsa ga rona go baakanngwe gore go goroge fa pele ga Rara wa rona yo o mo legodimong tse di mo natefelang, le go mo kgatlha.

Lefoko la thero ya kajeno le re: "Mme re itse gore bone ba ba ratang Modimo, dilo tsotlhe di dira mmogo go ba tsalela molemo, e bong bone ba ba biditsweng ka fa boikaelelong jwa Modimo." Ke mafoko a a re nonofisang gore re itshoke. Barategi, Lefoko le re: "Tsotlhe di dira go re tsalela molemo;" go rona ba re leng bana ba Modimo. A re se ka ra lebala gore fa re lela, re lela re ntse re le bana ba ona. Fa re le mo tlalelong, re ntse re le bana ba ona. Fa re itumetse, re ntse re le bana ba ona. Tsotlhe tse di diragalang mo botshelong jwa rona di a bonwa, di a tlhokomelwa, di itsiwe ke Rara wa rona yo o mo legodimong, ke ene yo o tshotseng botshelo, maitumelo, le matshwenyego a rona mo seatleng sa gagwe.

Re batlhaoledwi ba Modimo ka Keresete go tswa mo bosenangtshimologo, "lefatshe le ise le tlholwe," Baef. 1:3-4. Ka kolobetso re amogetswe mo kgolaganong eo ya batlhaoledwi ka go dumela mo go Jesu Keresete. Ka jalo "re tlhomamiseditswe gore le

fa e ka nna loso gongwe botshelo gongwe baengele gongwe balaodi gongwe dilo tse di leng teng gongwe tse di tla tlang gongwe dithata gongwe bogodimo gongwe boteng, le fa e ka nna sebopiwa se sele, ga di kgone go ka re kgaoganya le lorato lwa Modimo lo lo mo go Keresete Jesu, Morena wa ron,” Baroma 8:38-39. Fa re lwala ka bolwetsi jo bo maswe, a re se ka ra gopola gore Modimo o paletswe go re disa sentle. Fa re tlhagelwa ke tse di bosula, a re se ka ra bua gore Modimo ga o tlhole wa re rata. Fa re tshwenyegile mo go maswe, a re se ka ra belaela ka lorato lwa Modimo ka go gopola gore o re lebetse. Tshenyego ya rona ga se sesupo sa gore Modimo ga o tlhole wa re rata. Kana le mo ditlalelong tsa rona Modimo o itshenolela mo badumeding, fa o ba rata thata fela, fa o rata gore re tshwane le Morwaaona mo dipogong tsa gagwe. Modimo o a rata gore re nnele ruri mo pusong ya ga Keresete ka fa Lefokong le le reng: “Dipogo tsa sebaka seno ga se tsa sepe, fa di bapisiwa le kgalalelo e re tla e senolelwang,” Baroma 8:18.

A Modimo o re abele ka metlha Mowa o o Boitshepo gore o re direle tiro e kgolo ya go re tiisa mo tumelong ya nnete, re se ka ra belaela ka lorato lwa Modimo e seng ka gope, bogolo fa re kopana le matsapa a a rileng, mme re nne re boife Modimo, re o rate bogolo go dilo, re o ikanye ona o le osi, re dumele, fa o re rata tota, gonne re bana ba ona ka kolobetso, re ba lalediwa ba ona gore re amogele mmele wa ga Keresete, re nwe madi a gagwe a re a tshologeleletsweng go nna boitshwarelo jwa dibe, re dumele ditsholofetso tsa ona, re se belaele e seng ka gope. Amen.

9. Thapelo: Modimo Rara yo o mo legodimong, o re tiise mo tumelong. Re kopa jalo mo leineng la ga Jesu Keresete, Mopholosi wa rona. Amen. Thapelo ya Morena: Rara wa rona yo o mo legodimong ...

10. Sefela sa 385 - 166/173

A kagiso ya Modimo e e fetang thaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke P. C. Weber ka ngwaga wa 2014

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.